

Qimmit qimuttut Qeqertarsuarmit 2017 kingorna erniaasut tamarmik DNA-kkut misissortinnissaannik Naalakkersuisut peqquneqarnissaannik Inatsisartuni aalajangiiffigisassatut siunnersuut. DNA-kkut misissuinerup takutissavaa qimminik akusaqalersimanersoq. Naalakkersuisut peqquneqassapputaaq qimminik akusanik nassaartoqarpat, qimmimik akusamik piginnittoq qimmiutini akusaasoq toqukkusunneraa paasiniassallugu.

(Inatsisartunut ilaasortaq Doris Jacobsen Jensen, Siumut)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Siullermeerneqarnera

Aallaqqaasiullugu qimmit Qeqertarsuarneersut qimussimik sukkaniunnerni atorneqarnissaat KNQK-mit inerteqquteqarneq peqatigiiffimmi ileqqoreqqusat malitsigisaannik aalajangerne-rusoq erseqqissaatigineqassaaq, ileqqoreqqusat soqutigisaqaqatigiiffimmit oqaasertalersorne-qarsimapput aammalu kattuffiup qimussimik sukkaniutsitsisarnerannut peqataanernut taa-maallaat atuupput. Aalajangerneq tamanna oqartussaasunit aalajangigaanngilaq taamaattumillu Qeqertarsuarmi qimuttunik qimmiutillit inuusutissarsiteqarnerminni takornariar-titsisarnerminnilu sulianut allanut peqataasinnaanertik namminneq aalajangersinnaavaat.

Unnerluussisussaataasut suliassamik suliarinninnissaminut itigartitsereermata Qeqertar-suarmi suliassaq pisortatigoortumik naammassineqarpoq. Tamatuma saniatigut Qeqertarsuarmi qimmeqatigiinnik allanik kalaallit qimuttunik qimmerinngisaannik peqartoqarnersoq Kommu-ne Qeqertalimmi ilisimasaqarfigineqanngitsoq Naalakkersuisut ilisimatineqarsimapput. Tamatuma saniatigut qimmeqatigiinnik (racenik) allanik peqartoqarneranik tigussaasumik uppernarsaatiniq politiinut tunniussisoqarsimanngilaq. Tamanna tunngavigalugu suliassaq Naalakkersuisut ingerlateqqissinnaanngilaat. Politiinut ersarissumik nalunaaruteqartoqarsi-matinnagu Qeqertarsuarmi qimuttunik qimmiutillit tamaasa pasineqarnissaat inatsisitigut isumannaatsuunissaq eqqarsaatigalugu isornartoqarpoq.

Tamatuma saniatigut qimmit qimuttut pillugit inatsisissap nutaap kinguardeqqinneqarsimane-ra tamanit aamma ilisimaneqarpoq. Maannakkut inatsisaasoq naapertorlugu suliassaasinnaasoq, "allat" DNA-vinik akuneqarsimasunik paasinnittoqarsimatillugu, malersussallugu periarfissa-qanngilaq, taamaallaat akiliisitsisoqarsinnaavoq.

DNA-nik misissuinerneq suliniut piviusunnigortinneqassappat qimmit qimuttut pillugit inatsit nutaaq akuersissutigineqartariaqarpoq tamatumalu saniatigut tigussaasumik nalunaarutigini-ntoqarsimassaaq. Qimmit qimuttut pillugit inatsimmi nutaami kalaallit qimmiat qimuttoq akuneqarsimanngilluinnartoq qanoq ersarissumik nassuiarneqartariaqarnersoq ilanngunneqas-saaq. Manna tikillugu DNA-nik misissuinerit pitsaanerpaatut atorneqartarput tamannali kalaallini inuiaqatigiinni oqallisigineqarsimanngilaq. Soqutigisaqaqatigiiffinni qimmit isikkui tunngavigalugit qimmeqatigiinnik allaanerusunik (racenik) nassuiaaniarsarisooqartarunarpog.

Taamatut Naalakkersuisut oqaaseqarlutik siunnersuutip itigartitsissutigineqarnissaa inassutigaat.